

Alcuerdu sobre'l futuru d'IAS y la so militancia

L'Alcuentru Nacional d'IAS constata que:

-Ente la militancia d'IAS existen dos visiones estremaes sobre; (1) la trayectoria nos últimos años y sobre'l futuru papel d'IAS, (2) la trayectoria y papel de la federación UNA y (3) el procesu de confluencia col Bloque por Asturias.

-Eses dos visiones, nes qu'existen fondes diferencies, estremen el partíu en dos bloques que faen difícil caltener un funcionamientu afayadizu, yá que nun ye posible algamar un mínimu común denominador satisfactoriu, lo que pue facer entrar a IAS y a la so militancia, especialmente lo más activo, nuna dinámica de llucha y desgaste internu indeseable dende tolos puntos de vista.

Polo tanto la militancia d'IAS alcuerda lo siguiente:

- Los y les militantes que consideren positiva, con tolos matices, la trayectoria d'UNA y qu'apuesten pol procesu de confluencia col Bloque daránse de baxa como militantes n'IAS, Izquierda Asturiana dexará nesi mesmu momentu de pertenecer a UNA, y los militantes que sigan militando n'IAS decidirán soberanamente'l futuru de la organización.

- Nun se fadrá anuncia pública, comunicaos o declaraciones nin de la salida de militantes d'IAS nin de l'abandonu d'IAS de la federación UNA hasta depués del congresu del procesu. La forma concreta negociarase ente les partes pero en cualquier casu cada parte fadrá por minimizar al máximu los perjuicios d'esti alcuerdu pa la otra de les partes y, si ye necesario, esplicando la so postura ensin entrar en xucios de valor sobre la estratexa de la otra parte.

- Ratifícase l'actual Dirección Nacional d'IAS. Los miembros de la mesma que quieran participar nel procesu Compromisu daránse de baxa al mesmu tiempo que los demás compañeros que sigan esi camín.

- Comunicarase al III Congresu d'Unidá Nacionalista Asturiana (UNA) qu'Izquierda Asturiana (IAS) sal de la federación y nun va tar nel procesu Compromisu, y fadráse tolo posible pa, cuanto primero, iguar los trámites llegalos necesarios pa facer efectiva esta decisión.

- La baxa de la militancia fadráse efectiva nel momentu nel que se certifique la salida d'IAS de la federación UNA iguando los trámites llegalos necesarios, daqué que les dos partes se comprometen a axilizar pa facelo nel plazu mínimu posible en pasando'l Congresu d'UNA.

Sicasí, con toles sos diferencies, les dos visiones, ye dicir, los dos sectores conformaos n'IAS nesti momentu, coinciden na necesidá de trabayar por un polu autónomu y unitariu d'izquierda asturianista, daqué que ta nos propios oxetivos estatutarios de la organización, y que presupón qu'en dalgún momentu les estratexes puedan confluyir otra vuelta.

Uviéu, 19 de mayu de 2012